

ISUMALIUTISSIISUT

Sanaartornermut ataatsimiititaliamit tunniunneqartoq,

pineqarpoq

Atlantikup avannaata Kalaallilu Nunaata silaannartaasa angallavigineqarnerisa allaffissornikkut aqunneqarnerata nunatsinnut nuunneqarnissaa pillugu naalagaaffeqatigiit Canadami Islandimilu oqartussanut isumaqatigiinniuteqarnissaasa aallartinneqarnissaa siunertaralugu danskit naalakkersuisuinut saaffiginninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Anders Olsen, Tillie Martinussen, Jens-Erik Kirkegaard, Kalistat Lund aamma Ane Hansen)

Siunnersuutip aappassaaneerneranut tunniunneqartoq

Suliaqarnermi ataatsimiititaliaq ukuningga [kingullermik] inuttaqarpoq:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Kalistat Lund, Inuit Ataqtigiit, siulittaasup tullia
Inatsisartunut ilaasortaq Jens-Erik Kirkegaard, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Justus Hansen, Demokraatit

UKA 2015-p nalaani ull. 14. Oktober siullermeerereernermi siunnersuut ataatsimiititaliap misissorsimavaa.

Siunnersuutip imaa siunertaalu

Silaannartap angallavigineqarnerani aqutsinerup kunngeqarfimmut Danmarkimut nuunneqarnissaa pillugu danskit naalakkersuisuinik oqaloqateqarnerit Naalakkersuisut aallarnisarnissaannut pisussaaffilerneqarnissaat siunnersuummi siunertarineqarpoq. Piffissaq ungasinnerusoq tunaartaralugu pineqartup allaffissornikkut aqunneqarnerani Nuummumut atortuutunik suliffinnillu pilersitsinissaq Kunngeqarfimmut Danmarkimut Islandimit aamma Canadimit nuussinissami siunertaavoq. Tigussaasumik sinaakktissat inissitsinnagit aamma aatsaat Kalaallit Nunaanni inuit suliap ingerlanneqarnissaanut pisariaqartumik piginnaasallit

ima amerlatigilertinnagit kiisalu aningaasatigut kingunerisassat eqqortut inissereertinnagit pineqartup Kalaallit Nunaannut nuunneqarnissaa siunertaanngilaq.

Siunnersuutip Inatsisartuni siullermeerneqarnera

Siunnersuummut saqqummiunneqartumut siullermeerilluni oqallinnermi nalinginnaasumik tapersersuisoqarpoq. Naalakkersuisut akissuminni allannguutissatut siunnersuuteqarput ima oqaasertalimmik:

”Atlantikup avannaata Kalaallillu Nunaata silaannartaasa angallavigineqarnerisa allaffissornikkut aqunneqarnerata Kalaallit Nunaannut nuunneqarnissaa pillugu qulaajaanerup inerneranik UKA2016-mi Naalakkersuisut saqqummiusseqqullugit Inatsisartut aalajangiiffigisassaattut siunnersuut.”

Allannguutissatut siunnersuut saqqummiunneqartoq tunngavigalugu siunnersuut Sanaartornermut ataatsimiititaliamut suliassanngortinneqarpoq.

Siunnersuutip Ataatsimiititaliamit sularineqarnera

Siunnersuutaqqaartoq taamatuttaaq Naalakkersuisut allannguutissatut siunnersuutaat Ataatsimiititaliap isummersorfigai.

Nunap inatsisitigut aaqqissugaanerani inatsisinut sinaakkusiarineqartunut naapertuussinnaappat, ungasinnerusoq eqqarsaatigalugu silaannartap aqunneqarnera tamaat tigussallugu soqutiginaruussasoq naleqquttuussasorlu Sanaartornermut ataatsimiititaliap nalilerpaa.

Taamaakkaluartorli tamanna pillugu inassuteqarnissaq Sanaartornermut ataatsimiititaliap piginnaatitaaffianiinngilaq, tamannattaarmi siunnersuutaqqaartup siunertaata avataaniippoq, nunamimi maani suliffinnik, timitaliinikkut paasisimasaqarnikkullu piginnaasanik pilersitsinissamut sinaakkutissiornissaq siunertaagaluarpoq. Suliaq tamanna siviluussasoq naatsorsuutigineqartariaqarpoq, isumatusaarnerpaassarlu danskit naalakkersuisui suleqatigineqarpat. Kalaallit Nunaannit tigusinissamik iliuseqarnissamut alloriaruqannginnerani, pineqartup siullermik naalagaaffeqatigiinnit tiguneqarnissaa tunngaviusariaqarpoq.

Kingusinnerusukkat sinaakkutissat timalikkat sanarfineqareerpata, inuusuttullu naammattumik amerlassusillit ilinniagaqalereerpata piginnaaneqalereerpatalu, Kalaallit Nunaannit tigusinissamut apeqqut piviusunngorsinnaassaaq.

Siunnersuutip aningaasaqarnikkut kingunissai

Inatsisartut suleriaasianni § 33, imm. 1-imi allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunissai allaaserineqarsimassasut.

Siunnersuutip aningaasaqarnikkut kingunissai pillugit siunnersuuteqartut ima allapput:

” Isumaqatigiinniernerit il.il. Naalakkersuisoqarfiup suliamik naammassinninneratigut nalinginnaasukkut iluarsivigineqarsinnaanerit ilimagineqarpoq aammalu annerpaamik ukioq naallugu sulisup qulerarterutaata atorineqarnissaa naatsorsuutigineqarluni.”

Siunnersuuteqartut siunnersuutaani imaappoq Nunatta Aningaasivianit aningaasartuuteqartoqarnavianngitsoq, siunnersuummi ima suliarineqarpoq silaannarmik allaffissornikkut aqutsinermi akisussaaffik Naviar A/S-imi inissisimasutut naalagaaffeqatigiinnit tigummiinnarnissaa, taamaattumillu aqutsinermi atortuutitut silaannarmilu aqutsinermi sullissisussanik ilinniartitsinermi akissaajaatit pilersitsinerillu tassannga ingerlatiinnarneqassasut.

Taamaalilluni piginnaasanik atortuutinillu taamatut pilersitsineq siumut isigisumik sulisoqarnermut ataatsimullu akileraarutitigut iluanaaruteqartarnermut ajunngitsumik malitseqarnissaa naatsorsuutigineqarpoq.

Allanguutissatut siunnersuut akuerineqassagaluarpat nassuiaammut siunnersuutigineqartumut akissaajaatit naatsorsuutigisariaqarput, tamatumalu kinguneqaratarsinnaaneranut akissaajaatit, kiisalu atortuutitut, ilinniartitaanermut il.il. akissaajaatit naatsorsuutigisariaqarlutik; taakkulu pillugit Sanaartornermut ataatsimiititaliaq naliliivoq, aningaasat tigorianaat naammattut nassaarissallugit pisariaqartumik naalakkersuinikkut tapersersuisoqanngitsoq.

Ataatsimiititaliap inassutai

Tamanna tunngavigalugu Naalakkersuisunit allanguutissatut siunnersuut itigartinneqassasoq, kiisalu siunnersuutigineqaaqartoq akuerineqassasoq **Sanaartornermut ataatsimiititaliap isumaqatigiittup inassutigaa.**

Taamatut oqaaseqarluni isumaliutissiissummilu allassimasutut paasinnilluni Ataatsimiititaliap siunnersuut aappasaaniigassanngortippaa.

Anders Olsen, Siulittaasoq

Kalistat Lund

Jens-Erik Kirkegaard

Ane Hansen

Justus Hansen